

**Isumaginninnermut pisortaqarfik angerlarsimaffinni meerartaqarfiusuniit eqqissiviillortoqarsimatillugu ilisimatinneqarnerini aaqqiagiinngittoqartillugu akunnermiliuttuusarneq pillugu neqeroorummik pilersitsisoqarnissaa anguniarlugu Naalakkersuisut peqquneqarnissaat pillugu Inatsisartut aalajangiiffigisassaattut siunnersuut.**

(Inatsisartunut Ilaasortaq Anna Wangenheim, Demokraatit)

### **Akissuteqaat**

(Meeqqanut, Inuusuttunut Ilaqutariinnullu Naalakkersuisoq)

### **Siullermeerneqarnera**

Pingaartumik imminnut illersorsinnaanngitsunik meerartaqarfiusuni angerlarsimaffinni eqqissiviillortoqartarneq pinaveersaartinniarlugu, oqallinnermut pingaarutilimmut iluaqutaasumut, aaqqiagiinngitsoqartillugu akunnermiliuttuusarneq pillugu aalajangiiffigisassatut siunnersuummik pitsaasumik eqqarsarnartumillu siunnersuuteqartumut Anna Wangenheimimut, Demokraatit, qujanaq

Meeqqatsinnut siunissaannullu tamatta ataatsimoorluta akisussaaffeqarpugut. Meeqqat pitsaanerpaamik inuunermi atugaqassapput aamma isumassuisumik asanninnertalimmillu isumagineqassapput. Meeqqat peqqinnartumi toqqissisimanartumilu ilaqutariittut inuunermi peroriartornissaat meeqqanut pingaaruteqarlunnartuuvoq.

Ingammik inoqutigiinni aamma meerartalinni imigassaq, nakuuserneq angerlarsimaffinnilu eqqissiviilliornerit ajoraluartumik inuiaqatigiinni annertusiartortumik ajornartorsiutaapput. Taamaammatt tamatuminnga pinaveersaartitsinissaq annikillisaanissarlu annertuumik pisariaqarpoq.

Ukiaanerani ataatsimiinnermi 2023-mi qanigisariinni nakuusernerup akiorneqarnissaanik siunertalimmik iliuusissanut pilersaarummik Naalakkersuisut tunniussissapput. Iliuusissanut pilersaarummi ilaatigut imigassartorsimanerup kingunerisaanik nakuuserarneq ukkatarineqassaaq, tassani nalunngikkajupparput angerlarsimaffinni eqqissiviillortitsinermik atassuteqartartoq.

Angerlarsimaffinni eqqissiviilliornerit iliuuseqarfigissavagut. Sukkasuumik iliuuseqassaagut, kisianni aamma eqqortumik iliuuseqassaagut.

Angerlarsimaffinni meerartalinni eqqissiviillortoqarsimatillugu aaqqiagiinnginnermi akunnermiliuttuusarneq pillugu atuutsitsilerniarnermik siunnersuut qaninnerusumik misissorluarusupparput. Taamaattorli aaqqiagiinngitsoqartillugu akunnermiliuttuusarneq tamatigut pitsaanerpaamik aaqqiissutaasinnaangilaq.

Aaqqiagiinngitsoqartillugu akunnermiliuttuusarnermi pingaaruteqarnerpaasoq tassaavoq isumaqatigiissitsiniartumit ikiorneqarlutik illuatungeriit namminneq aaqqiissutissaminnik nassaassasut isumaqatigiissitsiniartorlu aaqqiagiinnginnermi kinaassusersioranilu illersuissanngitsoq, illuatungeriillu attaveqatigiinnerannik ikorfartuissasoq. Taamaammatt aaqqiagiinngitsoqartillugu akunnermiliuttuusarnermi illuatungeriit namminneq piumassutsiminnik peqataassasut aamma aaqqiagiinngissutsiminnut marluullutik

akisussaaffimmik tigusinissaminnut piareersimanissaat aaqqiissutissamillu nassaarlutik aallaavittut pisariaqarpoq.

Isumaqatigiissitsiniartup ajortup ajornerulersinnginnissaanut ilaqtariit iluanni nakuusertarneq pillugu ilisimasaqarluarnissaa pisariaqarpoq aamma pisuni aaqqiagiinngitsoqartillugu akunnermiliuttusarnermi illuatungeriit akornanni timikkut tarnikkulluunniit nakuusertoqarsinnaaneramik navianaateqarsinnaasoq nunani tamalaani misilittakkat takutippaat. Aaqqiagiinngitsoqartillugu akunnermiliuttusarnerup aaqqiagiinnginnerup ajornerulersinnissaa, nakuusertartup suliap ingerlaneramik uukapaatitsinissaa inullu nakuusernermik nalaataqarsimasup tatisimaneqartutut misiginissaa imaluunniit isumaqatigiissusiornissamut siorasaarneqartutut misiginissaa annertuumik aarlerinaateqarpoq.

Nakuusertartup nakuusersimanerminik nassuerutiginninnissaminut akisussaaffimmillu tigusinissaminut piffissaq sivisuumik ingerlasinnaasoq aamma inuup angerlarsimaffinni nakuuserfigitittarsimanerminik pineqartup tamakkiisumik akuersinissaminut piffissaq sivisuumik ingerlasinnaasoq nalunngilarput.

Taamaattorli ilaqtariinni allani pisuni nalaataqarnerluttuni aaqqiagiinngitsoqartuniluunniit aaqqiagiinngitsoqartillugu akunnermiliuttusarneq naleqqutorujussuusinnaavoq. Tamanna assersuutigalugu tassaasinnaavoq avinneq sioqqullugu avinnerup nalaani kingornalu aaqqiagiinnginnerit, ilaqtariit pisumik sakkortuumik aqqusaagaqareerlutik ingerlariaqqinnissaminnut oqaloqatigiinnissamut ikiorneqarnissamik pisariaqartitsisut, ilaqtariilluunniit meeqqamut pitsaanerpaq qanoq anguneqarsinnaanersoq pillugu isumaqatigiinnissaminnut ajornakusoortitsisut.

Siunnersuummut akuersinissaq periarfissanngortinniarlugu aaqqiagiinngitsoqartillugu akunnermiliuttusarneq pillugu periarfissat qanimut misissorneqarnissai pisariaqartoq qulaani allassimasut aallaavigalugit Naalakkersuisut naliliipput. Taamaattumik Naalakkersuisut tullinnguuttoq allannguutissatut siunnersuut saqqummiuppaat:

”Ilaqtariinnut aaqqiagiinngitsunut, nalaataqarnerluttunut allanngornerujussuarmik aqqusaagaqartunut neqeroorutissatut aaqqiagiinngitsoqartillugu akunnermiliuttusarneq atuutsilersinnaaqullugu periarfissanik nassuiaasiornissamik Naalakkersuisut peqquneqassasut pillugu Inatsisartut aalajangiiffigisassaattut siunnersuut.”

Matumuuna aalajangiiffigisassatut siunnersuut Inatsisartunut akuersaartumik suliassanngorlugu tunniuppara.